

周氏醫學叢書

第三十五冊



巢氏諸病源候總論卷十六

心痛病諸候

凡五論

心痛候

心痛者風冷邪氣乘於心也其痛發有死者有不死者有久成疹者心爲諸藏主而藏神其正經不可傷傷之而痛爲真心痛朝發夕死夕發朝死心有支別之絡脉其爲風冷所乘不傷於正經者亦令心痛則乍間乍甚故成疹不死又心爲火與諸陽會合而手少陰心經也若諸陽氣虛少陰之經氣逆謂之陽虛陰厥亦令心痛其痛引喉是也又諸藏虛受病氣乘於心者亦令心痛則心下急痛謂之脾心痛也足太陰爲脾之經與胃合

足陽明爲胃之經氣虛逆乘心而痛其狀腹脹歸於心而痛甚謂之胃心痛也腎之經足少陰是也與膀胱合膀胱之經足太陽是也此二經俱虛而逆逆氣乘心而痛者其狀下重不自收持苦泄寒中爲腎心痛診其心脉急者爲心痛引背食不下寸口脉沈緊苦心下有寒時痛關上脉緊心下苦痛左手寸口脉沈則爲陰陰絕者無心脉也苦心下毒痛

久心痛候

心爲諸藏主其正經不可傷傷之而痛者則朝發夕死夕發朝死不暇展治其久心痛者是心之支別絡爲風邪冷熱所乘痛也故成疹不死發作有時經久不瘥也

心懸急懊痛候

心與小腸合爲表裏俱象於火而火爲陽氣也心爲諸藏主故正經不受邪若爲邪所傷而痛卽死若支別絡爲風邪所乘而痛則經久成疹其痛懸急懊者是邪迫於陽氣不得宣暢壅瘀生熱故心如懸而急煩懊痛也

心痛多唾候

心痛而多唾者停飲乘心之絡故也停飲者水液之所爲也心氣通於舌心與小腸合俱象火小腸心之府也其水氣下行於小腸爲溲便則心絡無有停飲也膀胱與腎俱象水膀胱爲腎之府主藏津液腎之液上爲唾腎氣下通於陰若府藏和平則水液下流宣利若冷熱

相乘致府藏不調津液水飲停積上迫於心令心氣不宣暢故痛而多唾也

心痛不能飲食候

心痛而不能飲食者積冷在內客於脾而乘心絡故也  
心陽氣也冷陰氣也冷乘於心陰陽相乘冷熱相擊故  
令痛也脾主消水穀冷氣客之則脾氣冷弱不勝於水  
穀也心爲火脾爲土是母子也俱爲邪所乘故痛復不  
能飲食也

腹痛病諸候

凡四論

腹痛候

腹痛者由府藏虛寒冷之氣客於腸胃募原之間結聚



不散正氣與邪氣交爭相擊故痛其有陰氣搏於陰經者則腹痛而腸鳴謂之寒中是陽氣不足陰氣有餘者也診其寸口脉沈而緊則腹痛尺脉緊臍下痛脉沈遲腹痛脉來觸觸者少腹痛脉陰弦則腹痛凡腹急痛此裏之有病其脉當沈若細而反浮大故當愈矣其人不卽愈者必當死以其病與脉相反故也其湯熨針石別有正方補養宣導今附於後

養生方導引法云治股脛手臂痛法屈一脛臂中所痛者正偃臥口鼻閉氣腹痛以意推之想氣往至痛上俱熱卽愈

又云偃臥展兩脛兩手仰足指以鼻內氣自極七息除

病源候論 卷一  
腹中弦急切痛

又云偃臥口內氣鼻出之除裏急飽咽氣數十令溫中  
寒乾吐嘔腹痛口內氣七十所大振腹咽氣數十兩手  
相摩令熱以摩腹令氣下

又云偃臥仰兩足兩手鼻內氣七息除腹中弦切痛

### 久腹痛候

久腹痛者藏府虛而有寒客於腹內連滯不歇發作有  
時發則腸鳴而腹絞痛謂之寒中是冷搏於陰經令陽  
氣不足陰氣有餘也寒中久痛不瘥冷入於大腸則變  
下痢所以然者腸鳴氣虛故也腸虛則泄故變下痢也

### 腹脹候

腹脹者由陽氣外虛陰氣內積故也陽氣外虛受風冷邪氣風冷陰氣也冷積於府藏之間不散與脾氣相壅虛則脹故腹滿而氣微喘診其脉右手寸口氣口以前手陽明經也脉浮爲陽按之牢強謂之爲實陽實者病腹滿氣喘嗽左手關上脉足少陽經也陰實者病腹脹滿煩擾不得臥也關脉實卽腹滿響關上脉浮而大風在胃內腹脹急心內澹澹食欲嘔逆關脉浮腹滿不欲食脉浮爲是虛滿左手尺中神門以後脉足少陰經沈者爲陰陰實者病苦小腹滿左手尺中陰實者腎實也苦腹脹善鳴左手關後尺中脉浮爲陽陽實者膀胱實也苦少腹滿引腰痛脉來外澀者爲奔腹脹滿也病苦



腹滿而喘脉反滑利而沈皆爲逆死不治腹脹脉浮者  
生虛小者死其湯熨針石別有正方補養宣導今附於  
後

養生方導引法云蹲坐住心捲兩手發心向下左右手  
搖臂遞互欹身盡髀勢捲頭築肚兩手衝脉至臍下來  
去三七漸去腹脹肚急悶食不消化

又云腹中苦脹有寒以口呼出氣三十過止

又云若腹中滿食飲苦飽端坐生腰以口內氣數十滿  
吐之以便爲故不便復爲之有寒氣腹中不安亦行之  
又云端坐生腰口內氣數十除腹滿食飲過飽寒熱腹  
中痛病

又云兩手向身側一向偏相極勢發頂足氣散下欲似爛物解散手掌指直舒左右相皆然去來三七始正身前後轉動膊腰七去腹肚脹膀胱腰脊臂冷血脉急强悸也

又云苦腹內滿飲食善飽端坐生腰以口內氣數十以便爲故不便復爲

又云脾主土暖如人肉如始得發汗去風冷邪氣若腹內有氣脹先須暖足摩上下并氣海不限遍數多爲佳始得左迴右轉立七和氣如用腰身內一日一十三法迴轉三百六十骨節動脉搖筋氣血布澤二十四氣和潤藏府均調和氣用頭動搖振手氣向上心氣向下分

明知去來莫閣平手欹腰轉身摩氣蹙迴動盡心氣放散送至湧泉一一不失氣之行度用之有益不解用者疑如氣亂

### 久腹脹候

久腹脹者此由風冷邪氣在腹內不散與藏府相搏脾虛故脹其脹不已連滯停積時瘥時發則成久脹也久脹不已則食不消而變下痢所以然者脾胃爲表裏脾主消水穀胃爲水穀之海脾虛寒氣積久脾氣衰弱故食不消也而冷移入大腸大腸爲水穀糟粕之道路虛而受冷故變爲痢也

### 心腹痛病諸候

#### 凡七論

心腹痛候

心腹痛者由府藏虛弱風寒客於其間故也邪氣發作與正氣相擊上衝於心則心痛下攻於腹則腹痛上下相攻故心腹絞痛氣不得息診其脉左手寸口人迎以前脉手少陰經也沈者爲陰陰虛者病苦心腹痛難以言心如寒狀心腹病痛不得息脉細小者生大鞣疾者死心腹痛脉沈細小者生浮大而疾者死其湯熨針石別有正方補養宣導今附於後

養生方導引法云行大道常度日月星辰清淨以雞鳴安身臥嗽日三咽之調五藏殺蠱蟲令人長生治心腹痛

久心腹痛候

久心腹痛者由寒客於府藏之間與血氣相搏隨氣下上攻擊心腹絞結而痛藏氣虛邪氣盛停積成疹發作有時爲久心腹痛也然心腹久痛冷氣結聚連年積歲日月過深變爲寒疝

心腹相引痛候

心腹相引痛者足太陰之經與絡俱虛爲寒冷邪氣所乘故也足太陰是脾之脉起於足大指之端上循屬脾絡胃其支脉復從胃別上注心經入於胃絡注於心此二脉俱虛爲邪所乘正氣與邪氣交爭在於經則胃脘急痛在於絡則心下急痛經絡之氣往來邪正相擊在



於其間所以心腹相引痛也診其脉太陽脉厥逆斷急  
攣心痛引於腹也

### 心腹脹候

心腹脹者藏虛而邪氣客之乘於心脾故也足太陰脾  
之經也脾虛則脹足少陰腎之經也其脉起於足小指  
之下循行上絡膀胱其直者從腎上入肺其支者從肺  
出絡於心藏虛邪氣客於二經與正氣相搏積聚在內  
氣并於脾脾虛則脹故令心腹煩滿氣急而脹也診其  
脉遲而滑者脹滿也其湯熨針石別有正方補養宣導  
今附於後

養生方導引法云伸右脛屈左膝內壓之五息引脾去



心腹寒熱胸臆邪脹依經爲之引脾中熱氣出去腹中  
寒熱胸臆中邪氣脹滿久行無有寒熱時節之所中傷  
名爲眞人之方

久心腹脹候

久心腹脹者由府藏不調寒氣乘之入并於心脾脾虛  
則脹停積成疹有時發動故爲久也久脹不已脾虛寒  
氣積胃氣亦冷脾與胃爲表裏也此則府藏俱冷令飲  
食不消若寒移入大腸則變下痢

胸脇痛候

胸脇痛者由膽與肝及腎之支脉虛爲寒氣所乘故也  
足少陽膽之經也其支脉從目兌眦貫目下行至胸脇

裏足厥陰肝之經也其支脉起足大指叢毛上循入貫  
膈布脇肋足少陰腎之經也其支脉從肺出絡心注胸  
此三經之支脉並循行胸脇邪氣乘於胸脇故傷其經  
脉邪氣之與正氣交擊故令胸脇相引而急痛也診其  
寸口脉弦而滑弦卽爲痛滑卽爲實痛卽爲急實卽爲  
躍弦滑相搏卽胸脇搶急痛也

卒苦煩滿又胸脇痛欲死候

此由手少陽之絡脉虛爲風邪所乘故也手少陽之脉  
起小指次指之端上循入缺盆布亶中散絡心包風邪  
在其經邪氣迫於心絡心氣不得宣暢故煩滿乍上攻  
於胸或下引於脇故煩滿而又胸脇痛也若經久邪氣

留連搏於藏則成積搏於府則成聚也

皖南建德

周氏校刊



南京中医药大学图书馆版权所有